



VANJSKOTRGOVINSKA KOMORA BOSNE I HERCEGOVINE
СПОЉНОТРГОВИНСКА КОМОРА БОСНЕ И ХЕРЦЕГОВИНЕ
AGENCIJA ZA PROMOCIJU IZVOZA BOSNE I HERCEGOVINE



Agencija za
promociju
izvoza
Bosne i
Hercegovine

Br: 02-02-2-842-2/26

Sarajevo, 25.8.2026.

N/r direktora

PREDMET: *Poziv bh. kompanijama za učešće u poslovnoj posjeti Međunarodnom sajmu
LONDON BUILD EXPO, London, Ujedinjeno Kraljevstvo, 25–26.11.2026. godine*

Poštovani,

Vanjskotrgovinska/Spoljnotrgovinska komora Bosne i Hercegovine (VTK/STK BiH) poziva zainteresirane kompanije iz Bosne i Hercegovine da se prijave za učešće u organiziranoj poslovnoj posjeti Međunarodnom sajmu **London Build Expo 2026, koji će se održati 25. i 26. novembra 2026. godine u Londonu, Ujedinjeno Kraljevstvo.**

London Build Expo je najveći sajam građevinarstva, građevinskih usluga i održivosti u U.K. namijenjen profesionalcima iz oblasti **građevinarstva, arhitekture, investicija, projektovanja, proizvodnje građevinskih sistema i održive gradnje.** Događaj okuplja više od 25.000 stručnih posjetilaca, preko 650 izlagača i oko 900 govornika na 17 konferencijskih bina, te predstavlja odličnu platformu za uspostavljanje poslovnih kontakata i upoznavanje sa suvremenim trendovima u oblasti montažne, prefabrikovane i održive gradnje.

Više informacija o događaju dostupno je na: <https://www.londonbuildexpo.com/>.

ZAŠTO LONDON BUILD EXPO?

Građevinsko tržište Ujedinjenog Kraljevstva prolazi kroz intenzivnu transformaciju uslovljenu primjenom Modern Methods of Construction (MMC), zahtjevima održivosti i potrebom za otpornijim lancima snabdijevanja. MMC predstavlja širok krovni pojam koji se koristi u industriji nekretnina, stanovanja i građevinarstva za inovativne tehnike gradnje koje daju prednost proizvodnji i montaži izvan gradilišta u odnosu na tradicionalne metode gradnje.

Ovakav razvoj tržišta otvara prostor za međunarodne proizvođače i pružatelje usluga iz oblasti **montažne i prefabrikovane gradnje, uključujući proizvođače drvenih montažnih objekata, građevinskih komponenti, drvene stolarije i drugih proizvoda povezanih sa off-site proizvodnjom.**

Za kompanije iz Bosne i Hercegovine ulazak na tržište Ujedinjenog Kraljevstva zahtijeva više od same ponude konkurentnog proizvoda. Potrebni su kredibilitet, ciljano povezivanje sa relevantnim donosiocima odluka, razumijevanje tržišta i propisa, pouzdani poslovni kontakti i odgovarajuće pozicioniranje prema potrebama britanskog tržišta.



Branislava Đurđeva 10
71000 Sarajevo, BiH

Tel.: (+387 33) 566-222, 566-257, 566-253
Fax: (+387 33) 214-292, 566 258, 566-259

E-mail: cis@komorabih.ba
<http://www.komorabih.ba>

Ciljevi organizirane posjete London Build Expo 2026 stoga su:

1. Pozicioniranje bh. kompanija kao pouzdanih i konkurentnih partnera za razvoj i realizaciju projekata u Ujedinjenom Kraljevstvu;
2. Omogućavanje neposrednog uvida u način primjene suvremenih metoda gradnje na tržištu U.K., kao i razumijevanje zahtjeva i standarda koji se primjenjuju u realnim projektima.

KONCEPT POSJETE

Koncept je osmišljen kao ciljana poslovna i studijska posjeta, uz podršku **lokalnog partnera u Ujedinjenom Kraljevstvu - Naturally Beautiful Homes (NBH) iz Londona**. Kompanija NBH se bavi promocijom, distribucijom i vođenjem projekata izgradnje rezidencijalnih i komercijalnih drvenih montažnih objekata, drvene stolarije i namještaja na tržištu U.K. i drugih zemalja za klijente iz U.K., a posjeduje dobro poznavanje bh. kompanija i njihovih proizvodnih mogućnosti.

Posebnu vrijednost predstavlja iskustvo vlasnice NBH, gđe Amele Karajbić, koja više od 20 godina posluje u sektoru montažne gradnje na tržištu U.K. i drugih razvijenih zemalja, a već treću godinu za redom jedan je od ambasadora događaja London Build Expo. Gđa Karajbić je također jedna od osnivačica Britansko-bosanskohercegovačke privredne komore (BBHCC), sa kojom VTKBiH partnerski surađuje.

Podrška učesnicima i preliminarni program uključit će:

- Podršku u pribavljanju vize za U.K. (pozivno pismo);
- Organizirani stručno-vođeni obilazak ključnih sadržaja London Build Expo uz prethodni briefing o tržištu i sajmu, te analizu profila bh. učesnika;
- Prisustvovanje odabranim panelima/radionicama od interesa za bh. učesnike;
- Mapiranje relevantnih aktera (developeri, izvođači, arhitekte, projektanti, stručnjaci za nabavu i drugi donosioci odluka zainteresirani za MMC i drvene građevinske sisteme) uz mogućnost organiziranja B2B sastanaka sa potencijalnim partnerima i/ili učešća u networking aktivnostima.

KO MOŽE UČESTVOVATI?

Posjeta će biti organizirana za grupu **do 10 bh. kompanija** koje se prijave na ovaj poziv i budu odabrane u odnosu na sljedeće **kriterije za odabir kompanija**:

- Bh. proizvođači montažnih i prefabrikovanih kuća, drvenih konstrukcija, građevinskih komponenti, drvene stolarije, podova, zidnih obloga i drugih proizvoda relevantnih za MMC (pločasti namještaj za ugradnju – kuhinje, kupaone, plakari);
- Bh. pružaoci usluga projektiranja i izgradnje objekata prema zahtjevima MMC, sa iskustvom u DFMA (design for manufacturing);
- Firme koje mogu osigurati najmanje jednog predstavnika (menadžeri/eksperti) sa znanjem engleskog jezika za učešće u delegaciji;

- Kompanija je aktivni član VTK/STK BiH (redovno izmiruje obaveze plaćanja članarine u skladu sa članom 22. i 23. Zakona o VTK/STK BiH „Službeni glasnik BiH“, broj 30/1 i 72/1.) – eliminatoran kriterij;
- Prednost imaju firme sa iskustvom u izvozu i jasno definiranim interesom za tržište Ujedinjenog Kraljevstva.

Organizator VTK/STK BiH će svakoj odabranoj kompaniji osigurati **novčanu donaciju u iznosu od 2.000,00 KM** koja se može koristiti za pokrivanje troškova putovanja za njihove predstavnike i sl. troškove. Namjena i način isplate donacije će se detaljno definirati ugovorom između VTK/STK BiH i kompanije – učesnice (donacija se po pravilu isplaćuje po završetku posjete).

Troškovi koje snose bh. firme:

- troškovi putovanja (avio-karta, hotelski smještaj i lokalni troškovi) za svoje predstavnike, nakon obračuna donacije VTK/STK BiH;
- troškovi pribavljanja UK Standard Visitor (Business) vize (cca 320 KM);
- ostali lični troškovi koji nisu obuhvaćeni donacijom VTK/STK BiH.

Napomena: Registracija i ulaz na London Build Expo za poslovne posjetioce su **besplatni** uz prethodnu online registraciju.

Ukoliko ste zainteresirani da uzmete učešće u ovoj poslovnoj posjeti i prihvatate navedene uvjete, molimo da nam dostavite **original Prijave i 4 (četiri) primjerka popunjenog, potpisanog i pečatom ovjerenog Ugovora o reguliranju obaveza** na adresu:

Vanjskotrgovinska komora BiH, Branislava Đurđeva 10, 71000 Sarajevo, sa naznakom: PRIJAVA ZA LONDON BUILD 2026.

Prijavu učešća, kao i potpisan Ugovor o reguliranju obaveza u posjeti sajmu, molimo dostavite i u elektronskoj formi (skenirane) na e-mail adresu lejla.mededovic@komorabih.ba.

Rok za prijavu je 8.9.2026. godine. Kontakt osoba za dodatna pitanja: Lejla Međedović (033 566 231).

Za organizaciju posjete sajmu LONDON BUILD 2026 potrebno je imati najmanje 4 prijavljene kompanije koje zadovoljavaju kriterije poziva, u suprotnom VTK/STK BiH zadržava pravo otkazivanja organizacije.

S poštovanjem,

Prilozi: 1. Prijavni obrazac
2. Ugovor o reguliranju obaveza

